

Հավելված  
ՀՀ կառավարության 2025 թվականի  
նոյեմբերի 14-ի N 1597 - Ն որոշման

ՊԱՀԱՆՋՆԵՐ

ԱՐՏԱԴՐԱԿԱՆ ԿԵՂՏԱՋՐԵՐԻ ՆԱԽՆԱԿԱՆ ՄԱՔՐՄԱՆԸ ՆԵՐԿԱՅԱՑՎՈՂ

1. Սույն հավելվածով սահմանվում են արտադրական կեղտաջրերի նախնական մաքրմանը ներկայացվող պահանջներ՝ նախքան կենտրոնացված ջրահեռացման համակարգ դրանց արտանետելը:

2. Թույլատրվում է արտադրական կեղտաջրերի արտանետումը կենտրոնացված ջրահեռացման համակարգ, եթե կենտրոնացված ջրահեռացման համակարգն ունի բավարար թողունակություն, և տվյալ կեղտաջրի բաղադրակազմը և հատկանիշները համապատասխանում են Հայաստանի Հանրապետության ջրային օրենսգրքի 62.1-ին հոդվածի 1-ին մասի 2-րդ կետով սահմանված արտադրական կեղտաջրերի ջրահեռացման համակարգ արտանետման պահանջներին:

3. Արտադրական կազմակերպությունների կեղտաջրերը կարող են պարունակել տվյալ արտադրությանը բնորոշ աղտոտիչներ, ինչի համար դրանց արտահոսքը կենտրոնացված ջրահեռացման համակարգ սահմանափակվում է:

4. Արտադրական կեղտաջրերի՝ ջրահեռացման համակարգ արտանետման պահանջներին չհամապատասխանելու դեպքում արտադրական կեղտաջուր արտանետողները մինչև կենտրոնացված ջրահեռացման համակարգ արտանետելը պետք է իրականացնեն դրանց նախնական մաքրում տեղային մաքրման կառուցվածքներում՝ իրենց միջոցների հաշվին, իսկ համակարգի ոչ բավարար թողունակության դեպքում պետք է բացառել արտանետումը կենտրոնացված ջրահեռացման համակարգ:

5. Արտադրական կազմակերպությունների կողմից կեղտաջրերի նախնական մաքրումն իրականացվում է տեղային մաքրման կառուցվածքներում, որոնք պետք է նախագծի մաքրման կառուցվածք նախագծող կազմակերպությունը՝ հաշվի

առնելով կենտրոնացված ջրահեռացման համակարգ արտադրական կեղտաջրերի արտանետման պահանջները:

6. Մի քանի արտադրական կազմակերպություններից կեղտաջրերի միախառնումը թույլատրվում է յուրաքանչյուր կազմակերպության հսկիչ դիտահորից հետո:

7. Եթե հարակից տեղաբաշխված արտադրական կազմակերպությունները (քաղաքներում կամ արդյունաբերական գոտում կամ բնակավայրերում) ունեն կեղտաջրերի համատեղ մաքրում իրականացնելու տեխնիկական հնարավորություն և փոխադարձ գրավոր համաձայնություն, ապա արտադրական կեղտաջրերի նախնական մաքրումը կարող է իրականացվել մեկ միասնական մաքրման կառուցվածքում, որից հետո դրանք կարող են թափվել կենտրոնացված ջրահեռացման համակարգ:

8. Ռադիոակտիվ արտադրական կեղտաջրերի ջրահեռացումն իրականացվում է՝ համաձայն Հայաստանի Հանրապետության կառավարության 2006 թվականի օգոստոսի 18-ի N 1489-Ն որոշմամբ հաստատված պահանջների:

9. Բարձր կոնցենտրացված արտադրական կեղտաջրերը, որոնք կարող են առաջացնել քիմիական ռեակցիաներ՝ ուղեկցվող թունավոր կամ պայթյունավտանգ գազերի արտանետմամբ, էմուլսիաների և մեծ քանակությամբ չլուծված նյութերի առաջացմամբ, եթե չեն համապատասխանում ջրահեռացման համակարգ արտանետման պահանջներին, ապա նախքան ջրահեռացման համակարգ արտանետելը դրանք պետք է հոմոգենացվեն հավասարեցնող/միջինացնող ռեզերվուարներում:

10. Պայթյունավտանգ նյութեր պարունակող արտադրական կեղտաջրերի, ինչպես նաև արտադրական կեղտաջրերի քիմիական կամ ֆիզիկաքիմիական մաքրման անհրաժեշտության դեպքում նախնական մաքրման ընթացքում պետք է իրականացվի նաև մեխանիկական մաքրում:

11. Եթե արտադրական կեղտաջրերը պարունակում են միայն հանքային նյութեր, ապա դրանք կենտրոնացված ջրահեռացման համակարգ արտանետելը նպատակահարմար չէ, քանի որ տեղային (լոկալ) մաքրումից հետո այդ ջուրը կարող է օգտագործվել արտադրության մեջ:

12. Ջրօգտագործողների կողմից կոյուղու կոլեկտոր թափվող կեղտաջրերում պարունակվող վնասակար նյութերի թույլատրելի սահմանային արտահոսքի անհատական չափաքանակները հաշվարկվում են Հայաստանի Հանրապետության շրջակա միջավայրի նախարարի հրամանով:

13. Նախնական մաքրումից հետո արտադրական կեղտաջրերի արտանետումը կենտրոնացված ջրահեռացման համակարգ իրականացվում է Հայաստանի Հանրապետության կառավարության սահմանած ջրահեռացման համակարգերի օգտագործման կանոններով:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՎԱՐՉԱՊԵՏԻ ԱՇԽԱՏԱԿԱԶՄԻ  
ՂԵԿԱՎԱՐ

Ա. ՀԱՐՈՒԹՅՈՒՆՅԱՆ